

Christian Meivah



November - December, 2018

Lhani seh thuso

Private Circulation

Nalung sunga Jesu

Nalung sunga chu Jesu dia mun nakoi hitam? Mi tampin akoi chai tai. Jesu hung kit kah-a nalung sunga mun nagot loule vang geival tan nate, kigel phan! Service bol mi khat mun ning khat a *transfer* ahi tengle ahiloule lekha sim dia simlai khat mun chombekh a akichon teng le hiche mun thah a chun, chen na thei ding mun akihol jin ahi. In khat adoh-a amahon, 'mun ong aum poi' tia ahin donbut tengule 'hoilang ba kihol ding hitam' tin alung adong pan jie. Ahiloule Bus a touna ding namu lou tengle, chetei la nagot-a nadin jeng ham, ahiloule khat tou henga 'themcha khat kikhino, kei jong tou vinge' natia aman 'mun a-ong poi' ahinti leh nommo nasai.

Hiteng chule nalungah 'ama hin alungah keidin mun neile vang hi theina dinga' tia nagel ding ahi. Mi khat dia nalunga mun nanei tengle ama dia mun nangaito peh jeng thei ding ahi. Hijeh a hi lunga mun aum masat ngai ahi. Hiche banga chu, Jesun Christmas laiya nang lung sung a mun adei ahi. Kum 2000 masanga chu Rome lengpa Caesar Augustus chun aleng gamsunga mi ijat lhinga

hitam ti simna din thupeh ana neitai. Galilee gam Nazareth kho dalhan, min kisut lutna din Joseph jong chu David insung chilhah ahi jeh in, ajihol Mary chu toh Judea gam David kho pi Bathlehem jonin, anache lhone. Hiche lai chun Mary agai hamset tai. Bethlehem alhun lhonin, jinlhun ina mun a-ong tapon, amani dingin lhun na thei aum tapoi. Bongbuh khat a kiholdoh lhonin, bong lah-a alhung lhon tai. Hiche janle le chun Mary nao masa pen anasoh in, koima aki thopi dingla umlou ahin, ponin acha pa chu ajelin, gan-ankong sunga ana lupsah tai. Eiho henga kineosah kiti hi ipi ham, ti vetsah na dinga Jesu hitia ana pengah hinte.

Ipi dia bong ina Pathen chapa peng hintem! Vannoi pumpi le asunga um thil jouse chung a vai hompa chapa pentah gan-ankong sunga akilup sah chu eiho mihemte dia jachatna tah ahi. Ahinla Pathen in hichea kona eihil nomu uma hinte. Ajeh chu loupitah a apen sanga ki neo sah tah a apen chun, Jesu hi mivaicha migenthei, sonlel melpu, lou bol ho, mi noise ho, kelngoi chingho, mimol ho ngailu ahi, ti avetsah ahi. Hijeh chun Jesu kisan ho lah-a mi vaicha, mi genthei, anat asat tengle

sum le pai anei lou jeh-a mohthoh ho'n Jesu akisan tampen uve. Mi mol hon Jesu din mun apeuvin, mi hao hon vang apenom pouve. Mi vaicha ten Joseph le Mary chu mun anapen bong buh-a Jesun lhunna ding mun ana kimui. Mivaicha ten alung uva Jesu mun ana peuve. Mi Jesu dia alung kot hong ho henga lhung nom, lut nom ahijoi ti imuve. Tuchung Christmas in ilungkot hongu tin, "Hung in Jesu, nang lhun na kham kei koma aume, kalung kot kahong in kangah-e. Kalunga nangma lhunna ding mun a-ongnai" tin koucheh ute.

Mother Theresa in mivai cha migenthei ho jenna dia Calcutta a mun ong ana hollai chun, koiman anapenom poi. Mother Theresa in mivaicha ho dia alungkot ana hon ahi. Ajeh chu aman, mi kamu jouse mai-a Jesu kamui, anati. Thomhao tah-a mivaicha migenthei, ana asa ho ana boipi jeh chun Pathenin ahen tunin vannoi leiset mun tinna ama "Missionaries of Charity" aum tai. Hichu Jesu apeh thilpeh chu ahitai. Ahileh Jesu pennia nangman ama napeh thilpeh chu ipi ham?

Tuchung Christmas melchih na in, nalung kot chu Jesu din athah beh in honglen in. Ama ilung uva alut nome. Jesu ahung gol-lhanna, ama kho Nazareth a nivei jen lut dia aki got chun akhomi ten ana lut sah nom pon, hijeh chun akilen Capernaum a ana pansa jotai. A-insunga anaot jong imacha ding anati pouve.

2

Christmas natahsan hinam?

Ipi lha-a, ipi tarik-a Jesu ana peng mong ham? Jesu chu December 25 nia ana peng mong nam? tia mi dong jia atame. Lekha them ahung tam phat in, thudoh jat chom chom ahung umdoh tai. Hijeh chun Pathen thu min eidoh tengle Pathen thuchenga donbut ngai ahi. Pathen lekhabua Jesu pen phat le nikho chule kum akisun poi. Hiche ho het jeh a sochatna kimu ding dol ahilou jeh hinte. Ajeh chu phat le nikhon mi huhhingna apejou pon ahi. Bible simhat hon ahet doh diu chu, aphatlai hi phalbi daplai ahidan mu doh unte.

December 25 Christmas nikhoa ahung kimanlona hi, Rome leng Aurelius in 274 A.D. chun Pathen hou lou mihon, Dec. 25 nikhoa hi 'Jojoulou Nisa' (Sol Invictus) pathen pen nia ahouna diuva thu ana lhuhsah ahina chung a, Pathen hou hon Jesu pen nikho hicheni mama ahisah uleh Nisa houhon Jesu aki san nomna diuva Pathen tahsan ma sa hon ana gel jeh uva, Dec. 25 hi 336 A.D. a Jesu pennia nit dia ana phatsah-u hidin tahsan ahi.

Rome gam Constantine in ahinlah phat chun, aman Pathen hou hi ahin haphut in, kum 336 A.D. in Christmas hi December 25 ni hidin ana phong doh in ahi. Hiti chun, 601 A.D. in Pope Gregory the Great in Britain a missionary khat henga 601 a lekha ana thot a chun, Dec. 25 hi

Jesu pen nikhwa anit uva Christmas aman na diuvin ana seipeh tan ahi. Milui abangin vang, Dec. 25 hi ki moh phondoh jeng hinte, ajeh chu Sil Invictus hung kinit panna hi 12th. century lam joh ahi, jong atiuve. Mi lui abangin, Jesu pen chun John Baptist nu Zacharias jinu Mary chu lha gup naovop ahilai ahin, hijeh chun alha hi September ahiloule October hijonte, jong atikit ui (Lk. 1: 35-36).

Herod lengpa thina hi 4 B.C. hidin akihol doh in, achutileh Herod thi masanga Jesu anapeng ahitoh ahin suhtoh-u leh Jesu hi A.D. 1 a peng hilou din akimu doh kit in, B.C. 5 vela peng hijo din tahsan ahi. Chule Eastern Orthodox Church ten January 6 hi Christmas in ahin mang peh un ahi. 200 A.D. a Clement of Alexandria, lekhasut dung jui in, aphot le alha, anikho ho chung changa lunggel akipel sau sauve, anati.

Lunggel kika sau sau jong le kitona pen hi December 25 ahijo tan ahi. Vannoi in chule Pathen oi lou ho lah danin Jesu hi December 25 nia pengin atahsanui. Akum alha anikho ipi chu hita jongle van Pathen Jesu mela leiset a ahung kilah hi, aloupi-e. Pen nikho aum loule thi nikho umlou ahi jeh in, Jesu pen ni jong athupin, chule Jesu thini jong athupi thouve. Athi loule thinaa kon a hinkitna tha avetsah thei lou ding ahijeh in, abonin athupi jenge. Hijeh hin Jesu penni hi loupi tah in, eima ding cheh in mangu hite.

Jesu koi ham ?

Jesu pen kal kum 2013 ahi tai. Mihem hina lhingset leh Pathen hina lhingset ani nia nei-a peng Jesu bou ahi nalai-e. Jesu tichunga mihem hina achamkim in chule Pathen hina jong achamkime. Hijeh a hi eihon Jesu hi itahsanu ahi. Bible in, “Sem til chun thu ana umtan, thu chu Pathen toh umkhom ahin, chule thu chu Pathen masap ahi” ati (John 1:1). John 1:14 ah, “Thu chu tahsaphe ahung soh in, ilah uva ahung chengin” ahi, tin akisune. Chuhe lai paova ‘Thu’ kiti hi ‘Jesu’ kiseina ahi.

Jesun pa ni anei in, khat chu mihem-a apa hia Joseph ahin, chule khat kit chu Pathen ahinaa apa Pathen chu ahi. Jesu hi mihem akeh khat leh Pathen akeh khat nei ahi poi. Ani nia lhingset set-a anei ahi. Amin jong amihem hinaa kona ase tengule ‘Mihem Chapa’ akiti jin chule Pathen ahinaa ase doh tengule ‘Pathen Chapa’ akiti jie (Mt. 8:20, Mt. 12:8).

Jesu hi tonsot a hing ahin, leiset mihem ten anatha vangin ni 3 nin ahing doh kittai. Pathen ahi jeh in thimo ahi, vannoi mihem ama tahsan jouse jong thimo dia ahung gon toh chet ahitai. Tunin Jesu tahsan jouse sen alei hinkhoa kipana amuvin, athi jouva jong Pathen koma cheng diu ahitai. Hiche hi Pathen mi lungsetna jeh ahi. Jesu hung kipa piute. Ahung jeh-a van gama ilut thei diu ahitai.

Thingthem bolpa khat

Thingthem bolpa (carpenter) khat hinkho in New Testament akipane. Mi nunnem thingthem bol khat a kona Christmas thusim ahung kipat hi akidange. Mi mai-mai thingthem bol Joseph henga vantil khat ahung kilahna ajeh pipen hi, “Joseph hi midih tah ahi jeh in, Mary hi lhangphonga mipi seithang a umtah ding anompon, guhthim chaa akitepna lhon suhkeh-a, ki khenpi ding agoi” (Mt. 1:19), kiti hi ahi. Gollhang pha tamtah in, “Hiche nu hin eilhem lhatai” tin gell inte.

Joseph pandan hi adihmo poi. Ahinla hitia akijumsona pena kona mi mantam khat hung hidoh thei ahi. Alung lhahna pen chun ahin dopsang joh ahitai. Milung theng khat ahi jeh chun Pathenin amang chai. Hiche lai khang ding chun hi tia naovop numei hi songa selih ding anahi. Athu hi mijalah-a aseidoh leh nungahnu thoh ding hi ahen, hijeh chun lhangphonga seidoh ding ana nompoi. Hiche chung chonna, jan a amanga numeinu chu aginmo lou na dia kiseipeh chu atahsan jengin, ajinu din ana kipui jotan ahi (Mt. 1:24). Joseph hi milungtheng ahi jeh in Pathenin amange. Pathenin mi avet tengleh asunglam ave masa jie. Hijeh chun vannoi henga apeh ding thilpeh lenpen tah chu, Joseph ana mangchan ahinpe thei tai. Joseph a konin huhhingpu Jesu ahung peng in, mi nunnem Joseph jeh in eihon

lhatdamna ikimu thei tauve. Joseph hi eiho din mi mantam ahi. Ama jal a Christmas hung kibol thei ahitai. Ahile, sopi nangla, Pathen mitmua milung theng nahia hinam? Nahile Pathenin namangcha nome!

1844 chun H.L. Hughes Fiji Islands gam ven anachei. Hiche lai chun mi khat hi dangka 350 a kichoh thei anahi. Nakichoh jou tengleh an na ngolthi sah thei, navoh lih thei, athi teng naneh doh thei ahi. Koiman na chung naheh theilou ahi. Hitia hi soh ana kichoh jiu ahi. Kum phabep jouvin Fiji Islands a hin anache kit in ahileh soh dingin mihem ana kijoh tapoi. Kidang asan ajeh chu adoh-a ahileh, Fiji Islands a Christa thu akilhangsap tan, hou bung 1200 vel ana umtai. Pathen mi lungsetna in mihemte lah a na ana tong tan ahi. Ngailutna in vai anahom tai. Jesu Gospel in mi acham lhatsah tan, sohchanna abei tan ahi.

Rom. 8:32, “Achapa gei-a khen lou hela eiho chengse dinga pedoh jenga chun, iti ama chutoh ijakai manbei-a eipeh da diu ham?” Thilpeh lenpen eikipeu chu Jesu ahin, Jesu hi atahsan ho din ijakai ahi. Ima jouse bukimna Jesua aume. Jesu nei chu dei le ngai bukipna ahi. Hijeh chun Jesu nangaichai tihi sumil hih in. Leiset lamkai lenho anga iti nakisuh nem ham, hiche sang a chu nemjep neojep a Jesu henga kisuh nem angai tai. Mi kineosah Pathenin angaichan, amangcha nome.

Pathen chapa mihem

Pathen vantil Gabriel chun Mary koma, (i) “Nagai-a chapa khat nahin ding, amin Jesu nasah ding ahi” (Lk. 1:32) tia aseisa banga, amin sah ding le, (ii) Israel dan dung jui-a, chapa peng masa Pathen a pehdohna ding leh, (iii) anu Mary suh thengna dia, Pathen chapa mihe ma ahung pen chu ni get lhin nia Jerusalem hou-ina apui-u ahi. Hou-ina Jesu apui-uhi Luke sut Kipana Thupha jihpan bou asut doh ahi.

1. *Amin Jesu asah-u* : Israel dan a naosen peng chu, niget lhin nia hou ina puitei ding, kum khat lhingsa kel ngoi khat pumgo thilto hiding, chonset jala thilto dia vapal ham va khu ham khat toh naosen hou-ina apui jiu ahi. Pathen chapa amin Jesu asah pau dinga chu kum khat lhingsa kelngoi khela vapal nou khat pumgo thilto ding chule khat chu anu Mary suhthengna dia apeh-u ahi. Israel dan dung jui-in nao minsah leh Cha pa Pathen dia peh lutna leh anu Mary suhthengna kin abolchai tau vin ahi.

2. *Mihema peng Jesu* : Pakai Jesu mihema apen lona pen hi, Pathen gonsa ahi. Leiset leivui-a kistem doh tahsaphe nei-a hing mihem chun, hinna angaichat-a, kipalna anei khah le Pakai Jesun ahuhdoh dia agonsa ahi (Eph. 1:4-5). Mihem masa tenin kipalna anei lhon jeh chun Lhagaova athilo lhon tan, achilhah mi hem jouse jong Lhagaova thisa ahi

tauve. Pathenin ama hinna ‘hu’ chu asemsa mihem Adam nah homa ahai lut peh chu, a-Lhagao ahin, mihem chu Pathen ama toh hing khoma, Pathen deile gon banga asemsa thilsem um ding agon tohna chu mihem hi thet um dang toh ki bang lou, alhenchom anahi. Mihem masa teni chonsetna chu Pathenin ahina ding lhona agontoh akito lou phat-a, Lhagao ana lahdoh chu nung peh kitna thei lampi chu, Pakai Jesun thina asuh bei-a, Jesu ama ahindoh tahsan jouse Pathenin Lhagao apeh a hingdoh ahina hi leiset a Pathen Chapa hung pen lona ajeh pen chu ahitai.

3. *Jesu tahsan angaina* : Chonset jeh-a Lhagao-a thisa mihem koi hileh Jesu thi chu ama chonset jeh ahi tia atahsana, sopthenga auma Lhagao anungmu kitna dia Jesu atah san mong mong tengle Jesua kona hindoh kitna akisan ding ahitai. Ajeh chu, Pathen khut-a kile peh dohsa Pathen Lhagao chu michonse chang thei lou ahin, Jesu longdamsa sunga Lhagao chu Pathenin alut sah-a Jesu ahindoh kit banga, chonset thinaa kona hingdoh thei dia Jesun hiche kin chu ahung bolchai ahitai.

Hiche hi Pathenin mihemte athiden louna dia agon ahi. Chonse jouse thiding hitale Pathenin asemsa ama melpu mihem van gam lhung ding umlou ding, van mun hi ong lneh ding anahi. Jesu ahung pen hin mihemte van gam alhunna thei diu lampi ahung hil ahi. (Dr. T. Lunkim)

Mit-lhi mantam dan

Mihem kana, mihem mitlhi sona hi moh in amang poi. Mona bei mi khat tou akitha tengleh anu apa ainkote mitlhi along jie. Ama ho lhisona chu aga um ji ahi. Pathenin jong mitlhi sona ho adon dapoi. Hijeh a hi, Pathenin aphu alah ding kichat-a, mi lhilonna ding bol lou hel ding ahi. “Mitlhi puma muchi tuten, kipah thanom in aga kilo-u hen, kap puma muchi tua vaikon chu lhoga pumin kipala san hung kile hen” (Ps. 126:5-6). Mi khat in tahsa le lhagao a thoh hahsa tah athoh-a, gentheina le lhasetna adim teng aka leh, “Kap hih-o kap hih o” tia lhepbi ahah jin, chule naka jongle olcha chan kap in, kiti jongle eikingai peh jipoi.

“Ramah khoa lhaset lung hem, kale mao ogin, nasatah akijan, Rachel in achate aka ka jengin, athi gam tah jeh un lhepbi jou ahita poi” (Mt.2:18). Hichenu ka kisei bang bangin eiho lah a jong mona bei, mel hoitah tah mi tamtah aumtah lou jeh uvin, minute 1993 kum lai chun, lhepbi jou anahita pouve. Egypt gam a Pathen chate, genthei valuva aka ka phat chun Pathenin athoh jou pon, Mose chu amaho puidoh din ana ngansen ahi (Exod. 3:7). Pathenin Gideon jah a mihat gollhang pha Pakai in naumpi-e, agati leh Gideon in, Pakai lung phat moda tan, kapu kapa teu chun Pathenin Egypt a konin eipui doh uve, tia aseiu chu hoilamba hitam, tunla Midian

mite khut-a eipedoh tauvin, Midian mite khut thah lhaona bep kahidoh tauve, ati (Judg. 6:12). Pathenin Gideon akouva Midia mite khut a kona ahuhdoh bang chun, eiho lah a jong Pathenin Gideon tobang eihiu peu hen! “Tulai-a kap te anunnom nahiuve, ijeh inem itile nui ding na hiuve” (Lk. 6:21). “Lung lengvai te anunnom ui, Pathenin alhamon diu ahi” (Mt.5:4). Samuel nu Hannah hi Elkanah jipi nu ahin, cha aneilou jeh in athai kem nun abolset set le akap kap jin, chuin an ngolin anatao in ahile Pathenin kidang tah in chapa Samuel ahin pei. Samuel hi Israelte lah a thempu, themgao, thutan vai hom ahung hin, Elkanah thaikem nu chate sangin athupi jon ahi (1 Sam. 1:7). Nute jong Hannah taona bang a tao aumleh Pathenin ataonau angai peh ding ahi.

David hinkho veute. Ama hinkho hi lamkai hon kitil khouna nei ding ahi. Achapa Absalom in thadia adel del lai in, mitlhi le kap pumin, Olive molsanga akal touvin, kap pum puma thachol tah a lam ajot pettah in, Shimei kitipan songin asepep in, chule Saul lengpa na bolsetna ho jeh a Pathenin naleng gam nachapa Absalom apeh-a nang ma kichai doh nahitai, tin asamse se jengin ahi leh jalankai Abishai in David jah-a, ama khu gathat doh ing ting alol gatan tange, ati. David in Abishai, limsah datan, ijem itile Pathenin eigaosap dinga ahinsol himai intin, ahiloule Pathenin keima

phatthei eibohna ding joh hinte ati (2 Sam.15:30). Atah bah in, Pathen in athini gei in aleng chan sah tan ahi. David thoh hat dan hi aloupin chule akidange. Jesu chu loupitah a Jerusalem alut nin, mihon Pathen chapa Jesu ati tapon, Hosanna, David cha pa Pakai mina hungpa chu nunnom hen, ati jouve. Itia Jesu chu David chapa hithei ham, gelkham set ahi (Mt. 21:8-9).

India sunga christian te mit lhi along jinge. Hou lamkai mol thoh ho akija jinge. Pathen gam hung lhun dinghi ngalel ahitai. Tulai christian lamkai hon Pathen dei-a mi apuilou akimu jin, mihem joh kipasi ding, Pathen thutah thudih seiphong sang a, mihem ngainom seiding go atam cheh cheh tai. Revival hihen penthah hijongleh Pathen deipa chu holdoh utin, hichu mangcha joute. Pathen thu hi chemjam alangtoa hem sanga hemjo ahi, tihi sumil poute (Heb. 4:12).

Mi khat lung sunga Pathen lhagaovin athu akhum peh teng, alung chu tengcha, chemjama kisun abang jin, chonset kish jeh ham, huhhing kipa jeh ham in mi chu amit lhin ahin chup jitai. Kipana mit lhi hi Pakai angah pahnam tuipen hinte. Jesu tahsan ten, itahsan jeh-a lung lhahna inei lou hel diu ahi. Jesu tahsan ho chu atahsan gau amu ding uva umsa ahi. Phatah a lou lhouh chun ainuva alho gau akipoh cheh diu ahi, ti sumil poute. Jesu tahsan jingtau hite.

(Rev. Seikholen)

Judon thildih ham ?

Aphat louna aume, akiti vangin judon mi aum thouve. Ju joh jong atam cheh cheh in ahi. Gov't. in jong a-dukan hoa kona tax amu jeh un, dukan athah thah along nom ui. Christian te lah-a jong akikham tobang ahi vangin, christian judon inei jiuve. Ipi chu hijongle ju ngol thei ho mivangpha ahiuve. A-insungu dam jep tei, achate ajite kipah jep tei, in chen louchen kisuh jep tei, Pathen jong lungdam ahi.

1. *Hebrew thuchenga ju* : Hebrew paocheng ju dia kihaman pen hi 'yayin' ahi. Hichun 'akibil' ahiloule 'akihon sou' atina ahi. Hebrew pao cheng kahvah-a kimangji khat chu 'tirosh' ahin, 'juthah' ahiloule 'ju lhum' kitina ahi. Abana 'shekar' ki ti hijong akimangin, hichun khamna thei pou pou leh juchih aseina ahi. Abana 'chemer' jong akimangin, hiche hi Aramaic paova 'chamar' akiti. Abana, 'asis' thucheng ahin, adeh in lengpi twi a akimangin, akidon teng kikham behseh lou, aki ha donleh kikhamlo jiho ahi. Adang ju kiseina thucheng phabep jong aumin ahi.

2. *Greek paova ju* : Ju hi Hebrew paochenga tampi aumin, ahinla Greek a paocheng nga bou aumin ahi. Greek paocheng 'oinos' hi ju ti na ahin, hiche hi akiha man penin, Hebrew paocheng 'yayin' kimang pen tobang ahi. Greek paocheng ju min 'gleukos' hin, 'julhum' ahiloule 'juthah' tinan akimange. Ju chih hi

Minu mipa leh acha

Tulai khang hin cha kiti hi nule pa dingin aman atamin ahi. Icha idei banga ahung hin loule lung gimle gentheina tah ahi. Pai dingla hah, san dingla hithei lou khat ahung hijin ahi. Hijeh chun ichau hi aneova kipat phaten hilutin pui leu hen aphai. Ajinei jou gei-a vet vet nahlai angai jie. Tah sa lama akhantouna diu chule lhagao lama jong, ani nia khantou sah angai lseh tai. Lekha them lseh jongle hung kingol sah, neh lou ding don lou ding hinbol aum jie. Amaho hi anule apa'n lhagao lama anapui manlou ahi.

Minu le mipan acha chu Jesu asuhmil sah lou ding, Jesu um chan amahon ajomna diuva hilla lam kai ding dol ahi. Hichena dinga hin houbung jong angai in, hijeh hin cha te hou-in kai thaset sah louhel ding ahi (2 Cor.4:2). Samson pen masang chun, apa Manoah in vantil henga, "Apeng dingpa chun ipi bolin tem, itobang hinkhoa kimang ding ham" tin ana donge (Judges 13:12). Minu mipa dang hon jong, acha apen ma sangin Pathen henga, 'Kacha chun ipi hinbol leh natim' tin dongji leh achung uva Pathen kipah inte. Kho nung cross sepai dia insung khat hi 'training ground' ahi. Nachaten in sunga ipi pi aheth doh-a, ipi pi amu doh em ? (Isa.39:4). Pathen jen nu le pa amudoh nah um ? Jesun, "Pakai na Pathen chu nalungthim pum pia, nahinkho pumpia, naheth theina pumpia, na ngailut ding ahi" (Mt. 22:

37) tin ana sei-e. Chaten Christa leh houbung ngailu inkhat-a, na-in sungu chu amudoh-u hinam? “Ama san Pathen dei leh alenggam hol masauvin, chuteng adang ho cheng se nakipehbe ding u ahinai” (Mt. 6:33). Chaten insunga Pathen toh kilhon khom nulepa amudoh-u hi nam? (1 John 2:6). In chu Pathen thu kisei jingna insunga chaten amu doh jing u hinam? (Deut.6:6-7).

Pathen joh gel masa louva sum joh iti kimule pham tia kisalel mi atam tan, ainsungu jong veman lou khop in sum aholui. Mipa insung ngailu lou jong aume. Hiche ho hin chate lhagao hinkho sem manlou ahi. Achamo teng, ateh teng, hin vah ding, hin vui ding phatea akisemu angaiye. Chate hi adon lai-a akisem loule ahung let teng anu apa sanga kithep sah kihetsah ahiji tauve. Thu jong hin-ngai nom jilou ahitai.

Pathen he tobanga minu mipa um, ahiala hiche dung jui-a hinglou, lamjot lou jong aume. Hi chu chaten ahejie. Eima gentheina dia Pathen kihou doh jia jong aume (2 Tim.3:5). A-ina Bible sim manlou minu mipa jong aum jie. Pathen la jong akisah ji vangin, asung thu chu nit ding kigo jilou jong atame. Hiti hohi chaten amelchih kei jie. Minu mipa chihthei ngai inte. Pathen dia lungkot honglou ho komah satan achen ahonsah jin acheng jitai. Ama hon achateu mi asosah jita pouve. Hiho hi minu mipan kimmelchih hen.

Pathen thil kidang bol

Acts 9:11-12 akisima ahi leh Pathenin Paul rumal (handkerchief) leh aponsil ho aman chah-a mi asuhdam thu ho akisune. Paul atahsa tah in adamlou ho sudamin gache hih jongle a rumal athot a hichu adamlou ten atohkhah-a ahileh dam jengu anahi. Hiti tobang thil ki dang hi tulai in jong aum thouve. Pathenin na atohnom tengle atahsan mi koi hijongle amang jin ahi.

Pathen thu lhangsap a pang Smith Wigglesworth mun khat a Pathen thu lhangsama anache leh numei khat in, ka-ina nahung lhun tei ding ahi, kajipa ju akham val in, janle ina ahungji poi, ana tin ahile Smith hi amanu ina chun achen, amanun ajipa lupna a hiche jan chun ana lup sah in ahi. Ajing jingkalin amapa hi Pathen thu lhang sam din akigong tan ahile in-neinun ahenga, “Kajipa ajudon hailou lai-a itia neidalhah got ham, ni chong tadin,” tin akhamin ahile Smith in, “Tujan kalupna pon pha chu sop hih in, hia chu ka-ulsa le kajan taona kalhi maat ahi. Pathen in ka taona asan tokah in ponpha chu anasoppha hih in, achunga najipa adam gei-in ana lupsah in” tin ase in adalhai. Ajipa jukham phela ina ahunga lupna pon chung a alup leh ajinun aka ka ogin ajatan ahi. Tola akumin Pathen henga, “Pathen keima mi chonse kahi, nei ngaidam in” tin ase in, akap in, chule mi phatah khat ahung hi doh tan ahi.

Nui-hi, damna (Prov.17:22)

* English school a chapang koma oja pun, ‘How old are you’ Kuki pao in ledoh in atile, chapangpa’n “Iti lui-a lui nahi hitam?” kitina ahi anati.

* ‘Breaking News’ hi Kuki pao in ledoh in, tia school chapang khat oja pun adoh leh, “Thusoh keh deh duh” kitina ahi tin, adonbut-e.

* Mr. Sharma hi America achen tilin nikhat akenga ava leh hetman louvin ‘Heart Attack’ in aveilhu tai. Kho ahin het het in Ambulance khat in apon, hospital lam ana jone. Ahinla aman kahvah vah in, “Hari Om, Hari Om” tin kho asam peh in ahile gari tolpa sapkang ahi jeh chun, hospital a pui talouvin, a-in joh-a analhut tan ahi.

Ajinun gari tolpa henga, idia ama hi hospital a pui louva in lam joh-a nahin pui ham, tia adoh leh gari tol pan aman, “Hurry Home, Hurry Home, atijeh ahi,” tin adonbut-e.

* Pasal khat in Hotel khat a bu anen aneh jouvin aman Rs. 30/- apei. Ahung doh-a kenga lam themkhat ajot leh a-eh ahung soh loichel in, lampama athah loichel leh Police khat in amun aman tai. Alha dohna din aman Rs. 50/- Police pa chu anapen, ahin lha doh tai. In ahung lhunin aloi ho henga, Hotel a bu neh man dangka 30 ahin hichu akithah doh teng dangka somnga ahi, hijeh chun i-ina kikineh leh imacha kileo ponte, tin anasei in ahi.

* Upapu khat henga aloi hon, “Na chapa pihi ajou ase hat tave” atiule aman chuti lom ponte, tin ana kinel pin, nikhat chu athu sei-u chu dih mong ham, ti vetna din achapa chu toh, gammang khat-a analut lhon tai. Apan jong asemthum, “Ven, ven, sakhi khat alhai-e” atileh achapa chun jong, “Ahi, ahi, anou jong ka mui” anatin ahi.

* Ajinu naovop lai in, ajipa anadam moi. Amapan jong Doctor khat aga kivet sah leh ajun hinchoi in, vet angai-e, tin ahin seitai. Ajing jingkal in, hai khat a ajun chu atungin, akigot pet in, ajinun hai chu asukhan, alhun jun chu akibo tai. Ajipan hedoh le lunghang inte ti kichatnan, aman ama jun athal loi chel in atunge. Pasal pa chun jun chu Doctor pa ana vetsah a ahile Doctor pan, “Najuna kona kimu doh dung jui in, tulai tah hin nao khat navop-e” tin ana seipeh in ahile datmo tah in ina ana kilei.

* Kho khat-a upaho lunggel kitoh theilou ana hijinge. Nikhat pasal khat in agolpa henga, “Eiho kho pasal ho hi alungu akitoh chet jin ahi” atileh aloipa chun, “Ipi naseina ham, mi khat leh mi khat lungthim kipum tolouva, ipi chu akitoh dana nasei ham” tin ana ledoh in ahileh aman jong, “Hilouchu-o, lunggel kibah louna lamah ilunggelu akibang chet in ahi” katina ahi, ahinti.

* Naosena napen nin, nang nakap in, midang akipah-e. Ahinla, nathini le miho kap intin, nang hi van gam nalut ding jeh in kipah in nui in nate.

Het-a phachom ho

* Scientist hon thoukang in mi ape louna ding angaito nauva, thoukang pi ho khun atilchang (testicles) anei theina diu apha pen din agelun, ahi theina ding lampi jong amudoh tauve. Hiche hi ahin boldoh tengule invel thoukanga kona natpi hung kihom doh talou ding ahi. Ahinla gamjanga thoukang hin mi ape thei nahlai ding ahi. Thoukang achalin mi apet ngeipoi.

* **English kithem chuhna :**

- Decennial = occurring every 10 years.
- Duodecennial = every 12 years.
- Hebdomadial = every 7 years.
- Millennial = every 1000 years.
- Quadrennial = every 4 years.
- Quadricentennial = every 400 yrs.
- Quincentennial = every 500 yrs.
- Quinquennial = every 5 yrs.
- Quotidian = every day, daily.
- Semicentennial = every 50 yrs.
- Semidiurnal = twice aday.
- Vicennial = every 20 yrs., 20th anniversary.
- * Vannoi leiset a numei vanleng tol (pilot) 7409 alhing tai. India sunga numei lenna tol 1092 ahi. India sung a pilot jouse agoma 8797 ahi.
- * Manipuri Christian Fellowship, Guwahati (MCF-G) hi, April 1993 kuma ana kipan doh ahin, tukum Nov. 10, 2018 nileh Silver Jubilee kimang ding ahitai. Church dia Pillangkata muna gam akichoh uva kinit ding ahi. Tukuma konin MCF min hi Manipuri Church, Guwahati

in akikhel tai (MC-G).

* China gama christian ho akibe jing nan ahinla lhangphong ahi thei poi. Govt. in ahettep houbung aum in, in houbung aume. Govt. hetpeh houbunga hi, Pathen oiho nom tah a kikhom thei-u, Gospel thu ase thei-u, ahinla koima alahlut lou diu ahi. Chule in houbung hi in-khat a guhthima kikhom jiuva, Pathen oi thah aum le guhthima Baptise abol jiu ahi. Hijeh chun hiche guhthim paa konin Jesu kisan akibe jinge.

* Cambodia gam hi tupet in gam vaicha tah ahi. Buddhism hatna gam ahi. 1976-1979 sung chun kitha kimat ana hat in, lamkai ho milun ho asang sang ana kithat in, akivui na mun hi 'Killing Field' tin akihei. Tulai hi lamkai thah hung khan doh lai ahin, Pathen thu sei jong kikhom loulai ahi. Akikha masanga Pathen thu sei dia mi sol be be din apha.

* City Bus touna khat a mini bou touji ahi. Nikhat numei athao tah khat asakhao lentah kichoi in ahung lut in, anatou masanu chu apheineh neh in, atoumasanu chu akikhin khinin akineo sah jep jep in ahileh akoma tou hon atou masanu henga chun, 'idia kikhin neo neova genthei tah-a tou nahim, ot-da jengin' atiu le aman jong, 'Toukhom phat hi chu ti saolou ahin, chomkhat um khom na chung a ipi kiphun phun ding ham' tin anasei-e.

Ahimonge, lei hinkho hi sao lou ahin, insunga kinel nel ngao hite.

Christian Meivah
November - December, 2018

PRINTED MATTER

To :

Editor :
Rev. M. Haokhothong,
C/o, Tingjanem Manchong
Nichols Higher Secondary School, Satrihari,
P. O. Rehabori - 781008, Guwahati, Assam.

Christian Meivah - sim te taona akiman peh jinge. Sumto kuma Rs. 100/- ahin, asim nom hon hin peuvin, sum napeh lhaa kona kum nakisim peh ahi. M.O. hin thot hon Editor kipe ding lekha beh a namin le address suntei un. Editor pu Mobile No.94355-51080 ah hin hetsah un. Manipur le Naga land a sumto peh na thei ho :-

- 1) Mrs. Neijathem Haokip, Haokip Veng
- 2) Ms. Lhingjanem Haokip, KBC
- 3) Mr. Douzehen Guite, Dewlah Land
- 4) Mr. J. Manchong (Lunpu), KCC
- 5) Rev. Lhoukholal, Kangpokpi Missn
- 6) Mrs. Veikholam, Ideal school, cipur.
- 7) Rev. Seikholen, Medziphema, Nagld.
- 8) Mr. Seikholun Singsit, Kohima.
- 9) Mr. Kapcha Singsit, Dimapur.

Het-a phachom ho

* Giraffe (sa ngongsao) in mi ham sa ham khat apeh leh atha ahat beh seh jeh chun miham saham chun athilo jie.

* Twilung (snail) khat kum 3 gei alum thei-e.

* Lekha sim, lunggel pet-a ilung alutmo hel leh Champra (Lemon) akinah jile apha.

* Christian Meivah thuso lahna man Bank a hinthot nom hon hia hinthot un, chule namin le nasum thot jat chu Editor pa henga SMS or phone in hin hetsah tauvin :

M. Haokhothong, Bank of India,
Branch - Khanapara, Guwahati.
S/BA/c. No. 500910110000191
IFSC Code BKID 0005009